

# Jawapan kepada Ibn Muḥammad Al-Şamadī

(II)

Sebagai menyambung jawapan saya terhadap risalah mempertahankan “Azimat Kafan” yang telah diterbit dan disiarkan oleh Tuan Ibnu Muhammad al-Samadi kepada umum dan mengecam makalah saya yang tersiar di dalam majalah Qalam bilangan (217), maka di bawah ini saya bentangkan beberapa hadith Rasulullah (S.A.W) mengajar umat Islam cara-cara hendak menolong saudara-saudara mereka menghadapi huru-hara di dalam kubur dan melarang menggunakan “tangkal azimat” yang tidak akan memberi bekas kepada mayat-mayat yang telah berpindah ke alam arwah itu. Semoga akan ada juga faedahnya kepada seluruh umat Islam yang sedang menghadapi cabaran-cabaran hidup di zaman yang serba maju ini.

(Oleh: Abdul Aziz al-Mursyidi)

**Hanya dengan cara Berdoa sahaja:**

‘Mintakanlah keampunan bagi saudara kamu

Kita umat Islam telah diajar dan ditunjukkan oleh junjungan besar kita Nabi Muhammad (S.A.W), cara-cara hendak menolong saudara-saudara kita orang-orang Islam yang telah berpindah ke alam arwah, mereka bakal menghadapi penghidupan baru yang penuh dengan bermacam-macam pancaroba, tetapi cara yang telah diajarkan oleh baginda itu bukan dengan perantaraan sesuatu “azimat” yang dibekalkan di dalam kain kafan, tetapi dengan cara memohon doa ke atas roh si mati itu ke hadrat Allah *Subḥānahu wa Ta’ālā*. Cara meminta kebaikan untuk mayat di dalam kubur dengan perantaraan doa ini memang ada diriwayatkan oleh Saiyidina Uthman (R.A) dengan nas yang *sarīh* seperti di bawah ini:

(ini) dan mintalah ketetapan baginya lantaran ia sekarang sedang disoal”.

- (diriwayatkan oleh Abu Dawūd, al-Ḥākim  
dan al-Bazār).

Tentang soal mayat di dalam kubur ini Nabi (S.A.W) sendiri tidak pernah mengharapkan kebaikannya dengan lain-lain cara, selain dari cara berdoa ini, dan baginda tidak pula berani membayangkan dengan terang-terangan akan keadaan mayat yang telah berada di liang lahad itu, sama ada ia akan mendapat keampunan dari Tuhan atau pun menerima seksanya, hanya yang berani baginda katakan: "Jika seseorang daripada kamu mati, akan ditunjukkan kepadanya (kepada mayat itu) tempat duduknya pagi dan petang . . ." Lebih jelas lagi bacalah sabda baginda di dalam hadith yang diriwayatkan oleh Al-Bukhārī dan Muslim seperti di bawah ini:

*"Inna aħadakum idhā māta 'uriða 'alayhi  
maq 'aduhu bi al-ghadāti wa al-'ashiyyi in kāna min ahli  
al-jannati fa min ahli al-jannat, wa in kāna min ahli  
al-nār fa min ahli al-nār. Yuqālu: Ḧadhā maq 'aduka  
hattā vab 'athak Allāh ilayhi yawm al-qiyāmah".*

---

<sup>1</sup> Perkataan sebenar ialah salū bukan as’alū

### Jawapan kepada Al-Şamadī

Ertinya: “Sesungguhnya seorang daripada kamu jika mati, akan ditunjukkan kepadanya tempat duduknya pagi dan petang. Jika ia daripada ahli syurga, maka (ia akan lihat dirinya) daripada ahli syurga, dan jika ia daripada ahli neraka, maka (ia akan lihat dirinya) daripada ahli neraka. Akan dikatakan kepadanya: ‘Itulah tempat dudukmu hingga Allah membangkitkanmu kepadanya pada hari kiamat’”.

#### Penjelasan:

Dengan hadith ini terang-terangan Nabi (S.A.W) menyerahkan keadaan mayat yang di dalam kubur itu kepada pembawaan dirinya masing-masing; jika ia dari golongan orang yang soleh dan banyak amal kebajikan yang telah dilakukannya semasa ia hidup di dunia, maka ia sendiri akan ditunjukkan tempat yang bakal didudukinya pada hari kiamat kelak iaitu syurga, tetapi jika ia dari golongan orang yang *tālih* (jahat), maka ia akan ditunjukkan pula tempat yang bakal didudukinya pada hari ia dibangkitkan kelak iaitu neraka Jahanam. Ini sahajalah yang dikatakan oleh Nabi (S.A.W), tidak lebih dari itu. Kalau kaum kerabat si mati itu mengharapkan ia diringankan dari seksa kubur atau melepaskannya dari huru-hara di dalamnya, maka Nabi (S.A.W), menyuruh mereka itu memohon ke hadrat Ilahi dengan mendoakannya; sama ada doa mereka itu akan diterima atau pun ditolak, maka itu terpulanglah atas pertimbangan Tuhan, kerana kekuasaan memberi keampunan dan menyeksa seseorang itu adalah terletak di tangan-Nya (kekuasaan-Nya), sebagaimana firman-Nya dalam *Sūrah al-Baqarah* ayat (284) – yang telah

saya kemukakan dalam makalah saya di majalah Qalam bilangan (217) itu, baginda tidak memerintahkan supaya dalam kafan mayat itu dibekalkan suatu kebendaan yang berupa harta mahu pun tangkal azimat. Kerana perbuatan yang demikian itu – sebagaimana yang telah saya terangkan di majalah Qalam bilangan (225) bulan lalu – adalah menyerupai perbuatan pengikut-pengikut agama Majusi.

Maksud hadith di atas memang sesuai benar dengan firman Tuhan di dalam *Sūrah al-Zilzāl* ayat (7-8) yang telah saya bentangkan dalam makalah saya di ruangan majalah Qalam bilangan (217) itu, yang mana tuan Ibn Muhammad Al-Şamadī menuduh saya mengemukakan kedua-dua ayat tersebut “hanya agak-agak oleh fahaman palsu buat menentang ‘Azimat Kafan’ yang telah beliau siarkan kepada masyarakat umum itu. Saya masih belum faham dari segi mana beliau mengatakan saya membawa kedua-dua ayat itu ‘hanya agak-agak oleh fahaman palsu?’ Cubalah tolong tuan terangkan dengan jelas kepada saya jika risalah tuan yang kedua kelak tuan terbitkan pula!”

Di antara sebab-sebab maka Rasulullah (S.A.W) tidak berani membayangkan keadaan mayat yang telah berada di liang lahad itu sama ada ia mendapat keampunan dari Tuhan atau pun akan menerima seksa-Nya – selain daripada baginda tidak mahu mencampuri sesuatu urusan Tuhan di alam ghaib itu – ialah kerana baginda sendiri mengetahui bahawa arwah orang-orang yang telah mati itu akan melalui tiga ujian:

1. *Dammat al-Qabr*. (Himpitan kubur).
2. *Sū'āl al-Qabr*. (Soal kubur).
3. *'Adhāb al-Qabr aw Na'im al-Qabr*. (Azab kubur atau Nikmat kubur).

## Jawapan kepada Al-Şamadī

### Himpitan Kubur:

Menurut keterangan dari *Nuṣūṣ Aḥādīth*

*Sahīhah* bahawa setiap orang yang sudah mati itu – semasa mereka berada di alam Barzakh – (sama ada kecil besar, tua, muda, kafir Islam) semua mereka itu akan dikenakan himpitan kubur. Dalilnya sebagaimana sabda junjungan besar Nabi Muhammad (S.A.W) di dalam tiga hadithnya seperti di bawah ini:

1. “*Inna li al-Qabri ḏaghṭatan, law kāna aḥadun minhā nājiyā, lanajā minhā Sa‘ad bin Mu‘ādh.*”

Ertinya: “Sesungguhnya kubur itu ada mempunyai himpitan, jika ada siapa yang terlepas daripadanya, nescaya terlepaslah Sa‘ad bin Mu‘ādh”.

- Hadith riwayat: Ahmad dan Ibn Jarīr).

### Keterangan:

Sa‘ad bin Mu‘ādh seorang sahabat Nabi (S.A.W) dari kaum Ansar yang telah mengorbankan tenaganya yang bukan sedikit di dalam perjuangan mengembangkan Islam di kota Madinah dan seorang pembantu Nabi (S.A.W) menghadapi pemberontakan orang-orang Yahudi Bani Qurayzah di kota Madinah di dalam peperangan Al-Ahzāb yang lebih terkenal dengan nama peperangan “Khandaq”.

Beliau adalah dari keturunan Aus dan menjadi ketua Bani Abdul Ashal yang sangat besar pengaruhnya. Beliau masuk Islam dengan mudahnya di tangan Muṣ‘ab bin ‘Umair (salah seorang pengembang Islam yang diutus khas oleh Rasulullah (S.A.W) dari Makkah ke kota Madinah). Dengan sebab Islamnya beliau maka sekalian pengikut-pengikutnya daripada Bani Abdul Ashal terus memeluk agama Islam dan bersama-sama berjuang

dengan ketuanya menentang musuh-musuh Islam.

Akhirnya beliau diangkat oleh Rasulullah (S.A.W)

menjadi hakim untuk mengadili kesalahan orang-orang

Yahudi Bani Qurayzah yang mengkhianati perjanjiannya tidak akan serang menyerang dengan orang-orang Islam di Madinah. Kewafatannya adalah disebabkan luka parah di lengannya terkena anak panah musuh di dalam peperangan Al-Ahzāb.

Ibn Ishak menceritakan: Ketika Sa‘ad akan wafat – waktu tengah malam – datanglah malaikat Jibrīl ‘alayhi al-Salām – membalutkan kepalanya dengan kain sutera *istibraq* (sejenia sutera kasar), kemudian ia terus mendapatkan Rasulullah (S.A.W) seraya berkata: “Wahai Muhammad! Siapakah mayat ini yang dibukakan baginya pintu-pintu langit dan bergoncang arasy?” Setelah mendengar pertanyaan Jibril itu maka Rasulullah pun lantas bangun mendapatkan Sa‘ad, di kala kain tutupan Sa‘ad disingkap oleh baginda, maka di dapatinya Sa‘ad sudah wafat. Inilah di antara kemuliaan Sa‘ad bin Mu‘ādh yang dikurniakan Allah kepadanya dari masa hidup hingga ke hari wafatnya.

### Tujuan Saya Membawa Kisah Mu‘ādh:

Saya bawa kisah ini untuk pengetahuan para pembaca sekalian – kalau pun tuan Ibn Muhammad Al-Şamadī sudah mengetahuinya – ialah menunjukkan sedang beliau seorang sahabat Ansar yang dicintai oleh Allah dan Rasul-Nya, akan dikenakan juga himpitan kubur.

Sebagaimana pengakuan dari Rasulullah sendiri di dalam hadith di atas. Kalau Rasulullah (S.A.W) pada ketika itu diberi kekuasaan oleh Allah untuk melepaskan seorang sahabat yang dikasihinya itu daripada himpitan kubur nescaya baginda akan melepaskannya daripada himpitan kubur itu. Tetapi baginda tidak ada kuasa berbuat demikian. Hadith yang kedua pula nasnya seperti di bawah ini:

### Jawapan kepada Al-Şamadī

Sabda Rasulullah (S.A.W):

2. “*Law afłata aħadun min dammat al-Qabri la’ afłata hadħā al-Sabīy*”.

Ertinya: Jika ada seseorang yang boleh terlepas daripada himpitan kubur nescaya terlepaslah anak kecil ini”.

- Hadith riwayat: Al-Tabarānī).

Walau bagaimana pun himpitan kubur yang dikenakan ke atas orang-orang yang beriman itu tidaklah seberat himpitan yang dikenakan ke atas orang-orang kafir. Ini ada dijelaskan oleh Rasulullah (S.A.W) di dalam suatu hadith yang diriwayatkan oleh Al-Bayhaqī dan Al-Dīlmī, sebagaimana sabdanya:

3. “*Wa inna dagħtata al-qabri ‘alā al-mu’min ka al-Ummi al-Shaftiqah yashkū ilayhā ibnuhā al-ṣudā‘a fa tagħmazu ra’sahu għamzra rafiqā, wa lakin Yā ‘Ā iż-żebbu waylun li al-shākkīna fī Allāh kayfa yuḍgħaqi tħuna fī qubūrihim kaḍagħi tħalli al-ṣakhrati ‘alā al-bayḍah.*

Ertinya: “Sesungguhnya himpitan kubur ke atas orang mukmin (beriman) itu seperti ibu yang sayang, yang anaknya mengadu kepadanya sakit kepala, lalu dipicu kepalanya dengan suatu picitan yang lembut, tetapi wahai ‘Ā’ishah! Celakalah orang-orang yang syak (ragu-ragu) tentang (zat dan kekuasaan Allah).

Dengan amat dahsyat mereka dihimpit oleh kubur-kubur mereka sebagaimana himpitan batu gunung (yang keras pejal) atas sebiji telur”.

- Hadith riwayat: Al-Bayhaqī dan Al-Daylamī).

### Penjelasan:

Menurut keterangan dari tiga hadith tersebut

nyatalah kepada kita bahawa setiap manusia yang telah mati itu sewaktu mereka berada di lubang kubur – sama ada kecil besar, tua muda, kafir Islam – tidak syak lagi mereka tidak akan terlepas daripada himpitan kubur. Cuma cara himpitan yang dikenakan ke atas manusia yang beriman dengan manusia yang kafir itu adalah berbeza sebagaimana yang telah diterangkan oleh Rasulullah (S.A.W) di dalam hadith yang ketiga.

Di dalam hadith yang pertama dan kedua Rasulullah (S.A.W) menerangkan bahawa himpitan kubur itu – tidak syak lagi – mesti dirasai oleh setiap manusia yang telah mati walaupun ia seorang sahabat yang paling dikasihi oleh Rasulullah mahu pun ia seorang kanak-kanak yang masih bersih jiwanya (belum menanggung sebarang dosa).

### Mengapa kita ragu-ragu dan menyusahkan diri?

Di dalam hadith yang ketiga pula Rasulullah (S.A.W) menjelaskan perbezaan cara himpitan kubur yang dikenakan ke atas orang-orang mukmin (orang-orang Islam) dengan cara himpitan kubur yang dikenakan ke atas orang-orang kafir. Himpitan kubur yang dikenakan ke atas orang mukmin tak ubah seperti suatu picitan yang penuh dengan emosi “kasih sayang” dari seorang ibu ke atas kepala seorang anak kandungnya yang mengadukan sakit kepala. Adapun himpitan kubur yang dikenakan ke atas orang-orang yang kafir itu sama seperti himpitan setongkol batu bukit yang keras pejal ke atas sebiji telur yang berkulit lembut dan tipis.

### Jawapan kepada Al-Şamadī

Begitulah di dalam hadith ini Rasulullah (S.A.W) telah membayangkan dengan begitu jelas dan terang sekali akan himpitan kubur yang pasti dirasai oleh setiap umat manusia – sama ada kecil besar, tua muda, kafir Islam – yang berada di dalam kubur masing-masing. Jadi apa yang mesti kita bimbangkan dan apa yang mesti kita ragu-raguakan lagi? Bukankah setiap orang mukmin (yang benar-benar ia itu orang mukmin) telah dijamin oleh Rasulullah bahawa himpitan kubur yang akan dikenakan ke atasnya itu adalah ringan ibarat seorang ibu memicit kepala anak kandungnya yang sedang mengidap sakit kepala? Tidak percayakah kita dengan kandungan hadith ini? Bukankah orang-orang yang benar-benar mukmin itu apabila ia mati akan membawa bersama-sama dengannya amal kebajikan yang telah dilakukannya semasa ia hidup di alam dunia ini?

Hanya amal kebajikannya yang dibawanya itu sahajalah yang boleh melepaskan dirinya daripada himpitan kubur (yang boleh juga dianggap salah satu daripada huru-hara kubur yang bakal dihadapi oleh setiap manusia yang berada di alam barzakh kelak). Mengapa kita mesti bersusah payah menulis “tangkal-tangkal azimat” kemudian dimasukkan ke dalam sebuah botol yang bertutup rapat setelah itu ditaruhkan pula ke dalam kain kafan si mati itu untuk dijadikan bekalannya bagi mengelakkan daripada huru-hara kubur? Bukankah di lembaran kitab suci al-Qur’ān Tuhan ada menegaskan bahawa sebaik-baik bekal yang dibawa pulang oleh seseorang hamba ke alam akhirat untuk menemui Tuhannya itu ialah “taqwa” sebagaimana firman-Nya yang tercatit di dalam Sīrah al-Baqarah ayat (197):

“*Wa tazawwadū fa inna khayr al-zādi al-taqwā, wattaqūni yā uṭī al-bāb*”.

Ertinya: “Dan bawalah perbekalan, maka sesungguhnya sebaik-baik bekalan itu ialah “taqwa” dan takutlah kamu kepadaKu wahai orang-orang yang berakal!”.

Menurut firman Tuhan di atas hanya “taqwa kepada Allah” ini sahajalah sebaik-baik bekal yang patut disediakan oleh orang-orang hidup untuk persediaan menghadapi huru-hara kubur di alam barzakh nanti. Tidak percaya jugakah kita kepada akuan Tuhan di dalam firman-Nya di atas? Kalau Tuan Muhammad ibn Al-Şamadī menganggap bahawa ayat-ayat dan doa-doa yang tuan tulis di dalam “Azimat Kafan” yang tuan siarkan itu mengandungi berkat atau ada kekuasaan untuk melepaskan seseorang hamba daripada huru-hara kubur. Maka menurut fikiran saya ayat-ayat dan doa-doa yang terkandung di dalam kitab suci al-Qur’ān yang tiga puluh juzuk itu lebih besar berkat dan manfaatnya. Kalau begitu bukankah lebih baik kalau tuan fatwakan sebuah al-Qur’ān yang tiga puluh juzuk itu sahaja ditaruhkan ke dalam kain kafan orang mati yang bakal dimasukkan ke liang kubur itu dengan tujuan “*In shā-Allāh*” ditolongkan mayat itu daripada huru-hara kubur – sebagaimana kata tuan yang tertulis di bawah “Azimat Kafan” itu.

#### Soal Kubur:

Soal kubur ini ertinya ialah pertanyaan-pertanyaan mengenai iktikad atau akidah Islamiyah yang akan dikemukakan oleh dua malaikat yang bernama *XXX<sup>2</sup> wa Nakīr* kepada mayat di dalam kubur. Hal ini tak payahlah saya jelaskan kerana setiap orang Islam sudah pun mengetahuinya. Beberapa ayat Qur’ān dan nas-nas yang *sarīḥ* daripada hadith-hadith Nabi sudah pun menerangkan dengan jelas. Apa-apa pertanyaan yang bakal dikemukakan oleh malaikat *XXX<sup>3</sup> wa Nakīr* itu dan jawapan-jawapan yang mesti diberikan kepada kedua-dua malaikat yang bertanya itu biasa kita dengar sewaktu pak-pak imam membaca

<sup>2</sup> Perkataan sebenarnya ialah Munkar.

<sup>3</sup> Perkataan sebenarnya ialah Munkar.

### Jawapan kepada Al-Şamadī

talkin di atas kubur, kemudian daripada jenazah selamat dikebumikan.

#### Azab Kubur atau Nikmat Kubur:

Cuma yang patut rasanya saya terangkan ialah tentang “azab kubur atau nikmat kubur” salah satu daripada keduanya mesti dirasai oleh setiap manusia kemudian daripada ia mati – sama ada orang Muslim atau pun kafir – setiap orang Islam wajiblah mempercayainya, kerana banyak hadith-hadith Nabi yang menerangkan soal ini, di antaranya sabda Rasulullah *ṣallā Allāhu ‘alayhi wa sallam*:

“*Al-Qabru ḥufratun min ḥufari jahannam aw rawḍatun min riyādi al-Jannah*”.

Ertinya: “Kubur itu suatu lubang daripada beberapa lubang neraka Jahanam, atau suatu kebun daripada beberapa kebun syurga”

- (Hadith riwayat: Al-Bayhaqī dan Ibn Abī al-Dunyā).

dan sabdanya lagi:

“*Innamā al-qabru rawḍatun min riyādi al-jannati wa<sup>4</sup> ḥufratun min ḥufari al-nār*”

Ertinya: “Kubur itu tidak lain melainkan satu kebun daripada kebun-kebun syurga, atau satu lubang daripada lubang-lubang neraka”.

- Hadith riwayat: Ibn Mandah)

Walau bagaimana pun di dalam satu hadith yang lain yang diriwayatkan oleh Ibn Mandah juga, Rasulullah (S.A.W) menjamin bahawa setiap orang mukmin itu akan mendapat nikmat kubur sebagaimana sabdanya:

“*Al-Mu’mīn fī qabrihi fī rawḍatān khadrā’, yurāḥhabu qabruhu sabīna dhirā’ā, wayunawwāru lahu ka al-qamari fī laylata al-Badr*”.

Ertinya: “Orang mukmin di kuburnya itu adalah di dalam sebuah kebun yang hijau, diluaskan kuburnya tujuh puluh hasta dan diterangkan baginya seperti malam (yang gelap gelita disinari) bulan purnama”.

- (Hadith riwayat: Ibn Mandah).

#### Cara-cara Rasulullah (S.A.W) Minta Diperlindungi daripada Azab Kubur:

Kemudian saya suka membawa satu hadith yang diriwayatkan oleh Imam al-Bukhārī yang menerangkan bagaimana cara Rasulullah (S.A.W) meminta diperlindungkan dirinya daripada azab kubur yang mana cara yang dilakukan oleh baginda itu wajiblah diikuti oleh setiap kaum muslimin yang benar-benar mengakuinya sebagai seorang Rasul Allah. Cara baginda memohon perlindungan daripada azab kubur itu adakah dengan perantaraan sesuatu “azimat”?

Tidak! Tetapi hanya dengan perantaraan beberapa kalimah doa yang mudah difahami maknanya dan mudah pula dihafazkan jumlah katanya. Inilah doa baginda itu:

“*Allahumma innī a‘ūdhūbi min ‘adhābi al-qabr*”.

Ertinya: “Wahai Tuhan! Aku berlindung denganmu daripada azab kubur”.

Di dalam Islam tidak ada sesuatu amalan yang menyusahkan orang-orang mukmin melakukannya, sebagaimana firman Tuhan di dalam Sūrah al-Baqarah ayat (185):

“*Yurīdu Allāh bikumu al-yusra wa lā yurīdu bikumu al-‘usra*”.

Ertinya: “Allah menghendaki kelonggaran bagi kamu dan ia tidak menghendaki kesusahan bagi kamu”.

Di dalam Sūrah al-Baqarah ini juga ayat (286)

Allah berfirman pula:

“*Lā yukallifū Allāhu nafsān illā wus‘ahā*”.

Ertinya: “Allah tidak membebani (memberatkan) seseorang melainkan kadar kesanggupannya”.

<sup>4</sup> Perkataan sebenar ialah *aw* bukan *wa*

## Jawapan kepada Al-Şamadī

Mengenai Allah memberikan keringanan ke atas hamba-hambanya di dalam urusan ibadah dan kehidupannya silalah baca firman-Nya lagi di dalam Sūrah al-An‘ām ayat (152), di dalam Sūrah al-A‘rāf ayat (42), di dalam Sūrah al-Mu’minūn ayat (62) dan juga di dalam Sūrah al-Baqarah ayat (233).

Keringanan-keringanan yang diberikan Allah kepada hamba-Nya yang berjenis manusia ini, ialah dari kerana Allah itu mengetahui setakat mana kekuatan tenaga dan akal fikiran yang telah dikurniakkannya kepada manusia yang bersifat lemah ini. Ini memang Tuhan akui sendiri melalui firman-Nya di dalam Sūrah al-Nisā’ ayat (28):

*“Yurīdu Allāhu an yukhaffifa ‘ankum wa khuliqa al-insānu da ‘īfā”.*

Ertinya: “Allah hendak memberikan keringanan kepada kamu, kerana manusia itu dijadikan bersifat lemah”.

Kalau sudah begitu besar sekali keringanan-keringanan yang telah diberikan Tuhan kepada kita untuk menjalankan urusan-urusan ibadah dan urusan-urusan keduniaan kita, mengapa kita lebih sukakan perkara-perkara yang berat dan susah-susah? Kalau Tuhan sudah mengatakan memberi nikmat dan menyeksa manusia yang telah berada di alam arwah itu adalah urusannya sendiri, mengapa kita mesti bersusah payah hendak mencampuri urusan Tuhan itu. Kalau Nabi kita (S.A.W) sudah mengajar supaya kita meminta perlindungan daripada azab kubur itu dengan melalui doa yang dibaca, mengapa pula kita mesti menyusah-nyusahkan diri mencari kertas, dakwat dan kalam untuk menulis “Azimat-azimat Kafan” yang panjang berjela-jela, kemudian mencari pula botol yang bertutup rapat sebagai tempat ditaruhkan “Azimat Kafan” yang akan dibekalkan kepada mayat itu? Bukankah ini satu

perbuatan yang menyusahkan diri kita sendiri?

*Qad ṣadaqa Allāh bi qawlīhi fī kitābihi al-‘Azīz:*

*“Wa laqad ṣarrafnā fī hādhā al-Qur’ān li al-Nās min kulli mathal, wa kāna al-insān akthara shay’in jadalā”.* (Sūrah al-Kahf: 54).

Inilah tiga ujian yang mesti dilalui oleh setiap makhluk yang berjenis manusia sewaktu mereka telah bersemadi ke alam arwah, sebagaimana yang telah diterangkan sendiri oleh Rasulullah (S.A.W) melalui hadith-hadithnya yang telah saya bentangkan di atas.

### Hadith yang Melarang Tangkal Azimat:

Adapun mengenai tuan mengatakan: “Tidak ada al-Qur’ān dan al-Hadīth yang sah dan terang mengharamkan “azimat kafan” itu, maka di bawah ini akan saya kemukakan dua buah hadith sahih yang saya petik dari buku “Soal – Jawab” yang diterbitkan oleh “Persatuan Islam” Bandung – Indonesia (Penggal keempat muka surat 25):

1. “*Inna al-ruqā wa al-tamā’im wa al-qawlata<sup>5</sup> shirk”.*

Ertinya: “Sesungguhnya jampi-jampian dan tangkal-tangkal dan *tiwalah*<sup>6</sup> itu menjadi musyrik”. - (H. S. R. Ibn Hibban).

Maksud perkataan “*tiwalah*<sup>7</sup>” dalam hadith di atas - menurut *footnote* (catatan di bawah halaman atau dalam Bahasa Arab *Hāshiyah fī Asfala al-Safhat*) dalam buku “Soal – Jawab” tersebut ialah:

“Jampi-jampi” dan hafalan-hafalan ubat guna yang dibuat oleh seorang perempuan supaya dicintainya oleh lakinya (suaminya)”.

2. “*Man ‘allaqa faqad ashraf*<sup>8</sup> ”.

Ertinya: “Barangsiaapa menggantungkan (azimat) maka sesungguhnya ia telah jadi musyrik”.

- (H. S. R. Ibn Hibban).

<sup>5</sup> Perkataan sebenarnya ialah *al-Tīwalata* bukan *al-Qawalata*

<sup>6</sup> Perkataan sebenarnya ialah *tiwalah* bukan *tilawah*

<sup>7</sup> Ibid.

<sup>8</sup> Ayat yang sebenarnya ialah *Man ‘allaqa tamīmatan faqad ashraf* bukan *Man ‘allaqa faqad ashraf*

## Jawapan kepada Al-Şamadī

Kata pengarang buku “Soal - Jawab” itu mengulas tujuan kedua-dua hadith di atas:

“Dengan memperhatikan hadith-hadith itu, nyatalah bahawa percaya kepada tangkal-tangkal, azimat-azimat, tukang-tukang tenung, semuanya itu menjadikan seseorang kepada musyrik”.

### Ulasan dan Pendapat Saya:

Meskipun pengarang buku “Soal – Jawab” itu dalam ulasannya di atas tidak menerangkan jenis tangkal-tangkal dan azimat-azimat yang dilarang oleh Rasulullah (S.A.W) bagi seorang Muslim menggunakan sampai menjadikannya musyrik, tetapi saya tidaklah berani mengatakan “salah” kalau tangkal azimat itu keseluruhannya mengandungi ayat-ayat suci atau pun doa-doa yang dipilih daripada ayat-ayat al-Qur’ān untuk dijadikan pendinding diri dari mara bahaya oleh orang-orang yang masih hidup. Sedang Rasulullah (S.A.W) sendiri pun pernah membaca doa yang dipetiknya dari Sūrah Yasīn ayat (9) sewaktu baginda keluar daripada rumahnya yang dikawal rapi oleh pemuda-pemuda *kuffār* Quraysh yang bersenjata lengkap (pedang terhunus) yang telah diperintahkan oleh ketua-ketua mereka untuk membunuhnya. Dengan menaburkan segenggam pasir sambil membaca ayat tersebut, Rasul Allah (S.A.W) lantas keluar dari pintu rumahnya berjalan dengan langkah yang tenang di hadapan muka pemuda-pemuda Quraysh yang berkawal di sekeliling rumah baginda itu. Sehingga tidak seorang pun di antara mereka yang terlihat baginda keluar berjalan melalui lorong-lorong dan jalan-jalan yang mereka kawal dengan serapi-rapinya itu.

Di dalam peristiwa Isrā’ dan Mi’rāj pula diriwayatkan Rasulullah (S.A.W) ada membaca satu doa yang

*ma’thūr* (terpilih) ketika beginda bertemu dengan jin

Ifrit dalam perjalanan Isrā’ nya dari Makkah ke Bayt al-Maqdis lafadz niat itu adalah seperti di bawah ini:

“*A’ūdhu biwajhi Allāh al-Karīm wa bikalimāti Allāh al-tāmmāt al-lātī lā yujāwizuhunna birrun wa lā fājirun min sharri mā yunzilu mina al-samā’i wa min sharri mā ya’ruju ilayhā wa min sharri mā dhara’ a fī al-ardī wa min sharri mā yakhruju minhā, wa min fitān al-layli wa al-nahāri, wa min ṭawāriq al-layli wa al-nahāri illā ṭāriqan yuṭarraqu bi khayrin yā Rāḥman*“.

(Dipetik dari kitab: *Al-Isrā’ wa Al-Mi’rāj fī Daw’i al-Manhaj al-‘Ilmī al-Hadīth*”, karangan al-Ustadh Hamid Hafni Daud. – muka surat 10).

Setelah doa ini selesai dibaca oleh Rasulullah (S.A.W) maka pada ketika itu juga jin Ifrit yang membawa colocok api yang marak bernyala itu tersungkur jatuh dan colocok api yang di tangannya itu pun lantas padam.

Kesimpulannya dengan kedua-dua riwayat di atas yang saya petik dari buku-buku “Sejarah Islam” dan “Peristiwa Isrā’ dan Mi’rāj” menunjukkan bahawa Rasulullah (S.A.W) pernah menggunakan ayat-ayat suci daripada al-Qur’ān sewaktu baginda keluar dari rumahnya mematuhi perintah Tuhan untuk meninggalkan kota Makkah berhijrah ke Madinah dan pernah pula baginda menggunakan doa *al-ma’thūr* yang diajarkan oleh malaikat Jibril ‘alayhi al-Salām ketika baginda bertemu dengan jin Ifrit dalam perjalannya berIsrā’ dari Makkah ke Bayt al-Maqdis, sebagai dijadikan azimat pendinding dirinya daripada angkara murka yang bakal ditimpakan oleh musuh-musuh Allah